

*Ne bilem tibi moueant, inquit, malitiosi.] Vel, Ne malè te habeat malitiosorum prosperitas.*

OBSER.

1. Ista admonitio notetur illis, qui propter impiorum prosperitatem ita mouentur animis, ut cum Deo ipso propè contentionem & rixam instituunt. Qualis affectus ferè exprimitur Hierem. 12. ab initio capitis. Indignum putant Deo, qui hoc permittat, non videntes impiorum finem, & rationem diuinæ prouidentiae. Hic affectus plerunq; accidit feruidis spiritibus, quos subinde vsque ad eò impiorum prosperitas inflammat, ut ad diras imprecationes rapiantur: & clanculum eò abducuntur, ut cogitent & ipsi de iustitiæ studio deferendo. Itaq; operæ præcium visum est Prophetæ, ut illi mox ab initio Psalmi occurrat.

*Neq; inuideas operarij iniquitatis.]* Hoc est, Ne inuideas prosperitati illorum. Alicui quis inuidebit malis operationem iniquitatis? Hic affectus inuidiæ sordidior est & crassior, & eorum qui vellent esse loco impiorum, id quod priores nollent. Nemo enim inuidet cuiquam ob eam rem, quam sibi non sustinet optare, quam nec admiratur, nec appetit. Ista admonitio notanda est opulentarum vr, bium pauperibus.

2. Et obserua, quòd non dicit, Ne malè te habeat hominum felicitas & prosperitas, nèue illis inuideas, id quod omnino pessimi esset ingenij: sed admonet, ne malitiosis & operarijs iniquitatis indignemur & inuideamus, ipsis nominibus eos appellans, quibus isti solent, qui illorum felicitate ad indignationem mouentur & inuidiam. quasi dicat: Sunt malitiosi, sunt operarij iniquitatis, scio; sunt digni quibus omnia malè cedant, noui & hoc. Interea tamen cauebis, ne inuideas aut indigne ris illorum prosperitati. Quare? Audi:

2. *Quoniam tanquam fœnum velociter succidentur, & sicut herbarum germina decident.*

Lectio quadrat.

EXPLA-  
NATIO.

Hic versus causam reddit, & argumentum persuadendi habet, pertinens ad secundam classem. Dicit itaq;: Cogitas eos dignos esse qui succidantur & pereant: & quia non statim vides hoc fieri, doles, indignaris, & inuidia moueris: verum facis ista præter causam. Nam omnino interibunt, Sed virent ac florent. An interea stabiles sunt? Nunquid & herbae virent, ac citò decidunt & flaccescunt? Idem eueniet & istis. Et vide, quomodo non simpliciter dicat, *Quoniam succidentur & decident*: sed, *Citò, inquit, succidentur.* Atque hoc agit ipsa similitudine virentis herbae adducta, quæ non potest diu viuere.

OBSER.

Cùm ergo ita habeat conditio impiorum, ut prosperitas ipsorum sit peritura breui: quam quæso causam habent, qui illi indignantur & inuidet? Cùm vides diuitem impium in rebus Mundi florentem, quid aliud vides quàm fœnum viride, & breui casurum: cuius ea est fortuna, ut demetatur, B antequam spontè cadat? Aut herba, quæ etsi non demetatur, tamen spontè sua citò decedit?

3. *Spera in Domino, & fac bonum: inhabita terram, & pasce fideliter.*

4. *Et delectare Domino, & dabit tibi petitiones cordis tui.*

5. *Commenda Domino viam tuam, & spera in ipsum, & ipse faciet.*

6. *Et educet instar luminis iustitiam, & iudicia tua instar meridiei.*

7. *Sile Domino, expecta ipsum, ne bilem tibi moueat is cuius via prosperatur, qui vir est faciens fraudem.*

8. *Desine ab ira, remitte indignationem, ne succenseas saltem ad malefaciendum,*

9. *Quoniam maligni exterminabuntur: expectantes autem Dominum, ipsi hereditate possidebunt terram.*

10. *Et adhuc modicum, & non erit impius: considerabis locum illius, nec apparebit.*

11. *Mansueti autem hereditario terram possidebunt, & delectabuntur amplitudine pacis.*

LECTIO.

Vers. 3.

*Et pasce fideliter.]* Ebr. *וְרָעָה אֱמִתָּוָה*. Græc. & vulgata Latina: *Et pasceris in diuitijs eius.* Hieronymus: *Et pascere fide.* Sic & Iustin. Felix & Pagninus: *Et pasce veritatem.* Tigurina: *Et pasce fidem.* Felinus: *Et bona fide vitam agito.*

Vers. 5.

*Commenda.]* Ebr. *גִּלְעָלִיחָהוּ*. Græc. & vulg. Lat. *Reuela Domino.* Hieron. *Volue super Dominum.* Iustin. *Volue ad Deum.* Felix: *Circumuolue secus Dominum.*

Vers. 7.

*Sile Domino.]* Ebr. *דָּוַם לַיהוָה*. Græc. & vulg. Lat. *Subditus esto Domino, & ora eum.*

Vers. 8.

*Saltem ad malefaciendum.]* Ebr. *אַךְ לַחֲרֹעַ*. Græc. *ὡς πρὸς πονηρὰ ἔργα.* Vulg. Latina: *Vt maligneris.* Hieron. *Vt malefacias.* Sic & Iustin. Felix: *Attamen vt maligneris.* Pagninus: *Vt eruntamen ad malefaciendum.* Reliqua fatis concordant.

EXPLA-  
NATIO.

Nouem isti versus partim hortationem ac dehortationem habent, atq; hætenus ad primam classem pertinent: partim habent adiuncta persuadendi argumenta, atq; illorum gratia referenda sunt ad secundam classem.

Versus 3. tria habet, quæ facienda admonet Propheta.

1. *Spera in Domino.*

2. *Fac bonum.*

3. *Inhabita terram, & pasce fideliter.*

Versus 4. Adjicit quartum: *Delectare in Domino.*

r. Anni.